

MI POSESHONNAN

Lès 4

Ora bo a aseptá Kristo komo bo Salvador personal, Kristo a bira Rei di bo bida. Si E ta Rei, bo tin ku obedesé Dios Su Palabra den tur parti di bo bida. Un di e áreanan ku por mira fásil si Kristo di bèrdat ta Rei di bo bida ta den e área di poseshonnan.

KEN TA DOÑO?

Les e siguiente tekstonan, i yena e palabra ku ta falta:

1. Deuteronomio 10:14 “*Mira, na _____ ta pertenesé shelu i e shelu di shelunan, tera i tur loke tin den dje.*”
2. Salmo 24:1 “*Tera ta di _____, i tur loke ku e ta kontené, mundu, i _____.*”
3. Salmo 50:12 “*Si Mi tabatin hamber, lo Mi no a bisábo; pasobra mundu ta di Mi, i _____.*”

Segun e tekstonan aki, ta mas kla ku di dia ku Dios ta Doño di mundu i tur loke mundu ta kontené. Komo ku esei ta bèrdat, e tin siertu implikashon pa ku bo poseshonnan i sèn? Les e siguiente tekstonan i yena e palabranan ku ta falta.

4. Hende ta bisa: “Mi sèn ta di MI...di ningun hende mas!”
Dios ta bisa:
Hageo 2:8 “*‘E plata ta _____, i e oro ta _____,’ e SEÑOR di ehersitonan ta deklará.*”
5. Hende ta bisa: “Mi sèn ta di mi! Ta MI ku a traha pa hañ’ é!”
Dios ta bisa:
Deuteronomio 8:18 “*Ma kòrda SEÑOR bo Dios, pasobra ta E _____ pa gana rikesa...*”

Dios ta Doño di tur kos...inkluyendo tur bo pertenensianan, asta bo sèn! Tur kos ku bo a kere ta di bo, di bèrdat ta 100% di Dios.

SI DIOS TA DOÑO, ANTO...

Si Dios ta Doño di tur kos, anto echu ta ku bo ta solamente atministradó di bo poseshonnan. Un atministradó ta un persona ku ta manehá pertenensianan di un otro persona. E mes no ta doño. E tin ku usa e sèn bou di su kontrol manera e doño ke.

Segun 1 Korintionan 4:2, kiko ta rekerí di un mayordomo (atministradó)? _____

Si Dios ta Doño di bo sèn, anto bo tin ku buska pa sa kon Dios ke pa bo usa Su sèn i obedes'E. Dios ta duna hopi instruksion praktiko tokante finansa den Beibel. No tin espasio aki pa studia tur loke E ta bisa. Ma nos ke mira un punto importante ku ta demonstrá ku bo ta rekonosé Dios komo Doño di bo sèn.

PAKIKO DUNA

Hopi hende tin impreshon ku iglesianan ta interesá den sèn so. Lastimamente, tin iglesia i predikador awendia ku set pa sèn. Un aktitut asina ta kompletamente kontrario na Palabra di Dios.

Ma no por ignorá e echu ku Beibel ta papia tokante dunamentu di sèn na Dios. Kisas bo a tende diferente palabra pa esaki: ofrenda, kolèkt, désimo, èts.

Ta klaro ku Dios no tin mester di donashon debí ku ya kaba E ta Doño di tur kos. Ma tòg E ta deseá esaki. E ke pa bo duna n'E no pasobra E tin mester di bo sèn, ma pa bo mes bienestar. Bo lo benefisiá komo resultado di duna na Señor. Lesa e siguiente tekstonan i yena e palabranan ku ta falta.

1. Echunan 20:35 “...*Ta mas bendishoná pa _____
ku pa _____*”
2. 2 Korintionan 9:6 “*Awor esaki mi ta bisa; esun ku sembra skars lo kosechá _____ tambe; i esun ku sembra generosamente lo kosechá _____ tambe.*”

Bo mester ta kouteloso sinembargu pa bo motivashon pa duna no bira un motivashon di egoísmo: pues, duna pa haña.

KON PA DUNA

Ta notabel den Skritura ku Dios ta muchu mas interesá **kon** bo ta duna ku **kuantu** bo ta duna. Den otro palabra, pa Dios e **manera** bo ta duna ta mas importante ku e **montante** ku bo ta duna. Lesa e siguiente tekstonan, anto skirbi kon Dios ke pa bo duna.

1. 2 Korintionan 9:7 _____
Dios no ta interesá den e sèn ku un hende ta duna “*kontra su gustu*” òf pasobra e ta sinti “*obligá*”. E ke pa bo duna pasobra bo ke i pasobra bo ta stim’E. E aktitut robes mester kambia.

2. Proverbionan 3:9 i 1 Korintionan 16:2 ta usa e mésun palabra. Kiko e palabra ta? _____
Dios ke pa bo duna asina pronto ku bo ta haña. Pakiko? Ta un realidat di bida ku mas bo keda ku e sèn ku bo a kobra, mas difísil ta bira pa dun’e. Tambe Dios ke pa bo duna na kuminsamentu di luna, kinsena, òf siman anto konfi’E pa proveé pa bo na fin di e periodo ei. Esei ta presis e mensahe di Mateo 6:33, “*Ma buska **promé** e reino di Dios i Su hustisia, i tur e kosnan aki lo wòrdu añadí na boso.*”

3. Kon frekvente mester duna segun 1 Korintionan 16:2? _____

Dios ke pa bo duna ku regularidat. Maske ta bon pa bo duna ora bo ta mira un siertu nesesidat, Dios no ke pa bo duna solamente na e momentu ei. E ke pa bo tin e kustumber di duna na un forma sistemátiko.

4. Mateo 6:1-4 _____
Dunamentu ta algu entre abo i Dios so. Ningun hende mas mester sa kuantu bo ta duna.

5. Lukas 21:1-4 _____
 Dios ta midi bo dunamentu no segun kuantu bo a duna, ma segun kuantu bo a sobra.

KUANTU PA DUNA

Hopi studiante di Beibel ta haña ku tur kristian mester duna 10% di tur nan entrada na Dios. E 10% ei ta yamá e “désimo”.

E désimo sigur ta algu ku Dios a eksigí di hudiunan bibando bou lei di Moises (Deuteronomio 14:22). Ma otro tekstonan den Tèstament Bieu ta indiká ku hudiunan a duna muchu mas ku 10% (Numbernan 18:21-32; Nehemias 13:12; Deuteronomio 26:12). Ta kalkulá ku en total nan a duna 23,33% di nan entrada.

Hesus, bibando den era di lei di Moises, a aprobá di e désimo (Mateo 23:23).

Ma for di tempu ku Hesus a muri, lei di Moises no ta na vigor mas. Ningun teksto den Tèstament Nobo ta eksigí pa duna 10% di bo salario na Señor. Di bèrdat, ningun teksto den Tèstament Nobo ta indiká presis kuantu bo mester duna na Dios.

Ma 1 Korintionan 16:2 ta duna un indikashon. E teksto aki ta bisa pa duna “*segun ku prosperá*”. Pues, e teksto aki ta bisa pa duna konforme bo salario, esta dunamentu proporsional. Dunamentu segun e sistema di désimo tambe tabata dunamentu proporsional. Debí ku no tin otro indikashon den Tèstament Nobo kuantu bo mester duna na un forma proporsional, ta rasonabel pa tuma e désimo komo un bon surgenesia pa kuminsá. Pues, ta konsehábel pa duna por lo ménos 10% di bo entrada na Dios. I si bo ta duna motivá pa amor pa Dios, siguramente lo bo deseá pa duna mas.

TAREA PA KAS

1. Siña 2 Korintionan 9:7 fo'i kabes.
2. Konta un persona kiko Kristo a hasi pa bo.
3. Sigui fiel ku bo tempu ku Dios—sikiera 15 minüt—tur dia.
4. Lesa e siguiente lès i yena e kontestanan.